

VENDIM
Nr. 2, datë 10.1.2020

**MBI FILLIMIN E PROCEDURËS PËR SHQYRTIMIN E APLIKIMIT TË FSHU SHA
PËR PËRCAKTIMIN E ÇMIMIT TË SHITJES ME PAKICË PËR KLIENTËT QË
SHËRBEHEN NGA FURNIZUESI I SHËRBIMIT UNIVERSAL PËR VITIN 2020 DHE
SHQYRTIMIN E APLIKIMIT TË OPERATORIT TË SISTEMIT TË SHPËRNDARJES
SË ENERGJISË ELEKTRIKE PËR PËRCAKTIMIN E TARIFAVE, SIPAS NIVELIT TË
TENSIONIT PËR VITIN 2020**

Në mbështetje të nenit 16, të nenit 19, të nenit 20, germa “c”, të nenit 21 dhe të nenit 85, të ligjit nr. 43/2015, “Për sektorin e energjisë elektrike”, të ndryshuar; të VKM-së nr. 244, datë 30.3.2016, “Për miratimin e kushteve për vendosjen e detyrimit të shërbimit publik, që do të zbatohen ndaj të licencuarve në sektorin e energjisë elektrike, të cilët ushtrojnë aktivitetin e prodhimit, transmetimit, shpërndarjes dhe furnizimit me energji elektrike”, të ndryshuar, “Metodologjisë së përcaktimit të çmimeve për shitjen e energjisë elektrike me pakicë të klientët fundorë që furnizohen nga Furnizuesi i Shërbimit Universal (FSHU)”, miratuar me vendimin nr. 189, datë 23.11.2017, “Metodologjisë së llogaritjes së tarifave të Operatorit të Sistemit të Shpërndarjes së Energjisë Elektrike”, miratuar me vendimin e Bordit të ERE-s nr. 182, datë 10.11.2017; të nenit 15, të “Rregullave të organizimit, funksionimit dhe procedurave të ERE-s”, miratuar me vendimin e Bordit të ERE-s, nr. 96, datë 17.6.2016, Bordi i ERE-s, në mbledhjen e tij të datës 10.1.2020, mbasi shqyrtoi relacionet e Drejtorisë së Tarifave dhe të Çmimeve nr. 3/5 prot., datë 10.1.2020, në lidhje me shqyrtimin e aplikimit të FSHU sh.a., për çmimin e shitjes me pakicë për klientët që shërbehen nga Furnizuesi i Shërbimit Universal për vitin 2020 dhe nr. 3/5 prot., datë 9.1.2020, në lidhje me shqyrtimin e aplikimit të OSSH sh.a., për përcaktimin e tarifave të shërbimit të shpërndarjes së energjisë elektrike për vitin 2020,

konstatoi:

- Në lidhje me aplikimin e FSHU sh.a. për përcaktimin e çmimit të shitjes me pakicë për klientët që shërbehen nga furnizuesi i shërbimit universal për vitin 2020:

- Bazuar në nenin 19, të ligjit nr. 43/2015, “Për sektorin e energjisë elektrike”, të ndryshuar, ERE është institucioni përgjegjës për miratimin e tarifave për veprimtaritë e licencuara për të cilat është vendosur detyrimi i shërbimit publik.

- Me shkresën nr. prot. 3, datë 6.1.2020, FSHU sh.a. ka paraqitur aplikimin për çmimin e shitjes së energjisë elektrike me pakicë për vitin 2020, për klientët që furnizohen nga furnizuesi i shërbimit universal (FSHU sh.a.).

- Në aplikim sqarohet se FSHU sh.a. fillon operimin si një shoqëri e pavarur prej datës 1.1.2020, bazuar në detyrimet e përshkruara në licencën e furnizimit dhe atë të Shërbimit Universal, për të cilat ERE, me vendimet nr. 98, datë 17.6.2016 dhe nr. 112, datë 8.7.2016, vendosi miratimin e licencës së veprimtarisë së furnizimit të energjisë elektrike dhe përcaktoi FSHU-në për detyrimin e shërbimit universal, në zbatim të ligjit nr. 43/2015, “Për sektorin e energjisë elektrike”, të ndryshuar dhe VKM-në nr. 244, datë 30.3.2015, të ndryshuar.

- Sasia e energjisë elektrike e parashikuar për t’u furnizuar klientëve të cilët shërbehen nga Furnizuesi Universal për vitin 2020 parashikohet të jetë 5,090 gwh. Përlllogaritja e kërkesës për energji është bazuar në strukturën aktuale dhe parashikimin për vitin në vazhdim, por që në varësi të ndryshimeve të kërkesës së klientëve tariforë mund të jetë, gjithashtu, objekt i kompensimeve për diferenca në periudha të tjera.

- Energjia elektrike e parashikuar, për furnizimin e klientëve tariforë që shërbehen nga FSHU-ja, do të mbulohet nga energjia elektrike e prodhuar nga shoqëria KESH sh.a. dhe diferenca e mbetur do të plotësohet nga sasia e energjisë elektrike të mbetur nga prodhimi i HEC-ve private pas plotësimit të sasisë së humbjeve në rrjet nga OSSH-ja dhe sasia e energjisë elektrike të blerë në tregun e lirë.

- Shoqëria deklaron se çmimet për vitin 2020, me të cilat KESH-i, HEC-et private dhe OST-ja i shesin energji elektrike dhe shërbimin e transmetimit shoqërisë FSHU-së janë supozuar në 1.5 lekë/kwh për energjinë e blerë nga KESH, 8.46 lekë/kwh nga HEC-et private dhe 0.75 lekë/kwh për shërbimin e transmetimit nga OST-ja. Sipas shoqërisë, çmimi i energjisë elektrike të parashikuar për t'u blerë në tregun e lirë, gjatë vitit 2020, është përllogaritur bazuar në monitorimin e tregut të lirë për vitin 2019 dhe mund të ndryshojë duke u llogaritur si kompensim në vitet e ardhshme të përllogaritjes së çmimit të shitjes së energjisë me pakicë të energjisë elektrike.

- Për vitin 2019, shoqëria deklaron se kostoja mesatare e energjisë elektrike të blerë për klientët që shërbehen nga FSHU-ja rezulton të jetë afërsisht 5 lekë/kwh, nga ajo prej 4.13 lekësh/kwh e planifikuar, me një efekt prej rreth 5.6 miliardë lekësh më shumë, si rrjedhojë e mosrealizimit të furnizimit të parashikuar nga KESH, për shkak të situatës jo të favorshme hidrologjike.

- Shoqëria ka paraqitur në formë sintetike shpenzimet operative të parashikuara për vitin 2020 të llogaritura sipas koeficientëve, bazuar në një studim mbi ndarjen e shoqërisë OSHEE në shoqëritë OSSH dhe FSHU, duke u mbështetur në të dhënat historike dhe realizimin e tyre për periudhën 2016–2019, buxhetimin e shpenzimeve operative për vitin 2020, si dhe realizimin e të ardhurave të kërkuara për vitet 2015–2019 dhe ato të parashikuara për vitin 2020.

- Shoqëria deklaron se amortizimi i aseteve për vitin 2020 është llogaritur në nivelin 10% mbi amortizimin e aseteve shtesë për vitin 2019.

- Shoqëria duhet të paraqesë llogaritjet e amortizimit të akumuluar për periudhën 2015–2019, për asetet dhe shtesat sipas viteve të cilat i përkasin shoqërisë FSHU sh.a., krahas aseteve fikse të cilat do të transferohen nga shoqëria “mëmë” dhe do t'i shërbejnë shoqërisë FSHU sh.a. për ushtrimin e aktivitetit të licencuar.

- Shoqëria deklaron se marzhi i fitimit i llogaritur nga FSHU-ja rezulton në nivelin 3%, i cili është llogaritur mbi kostot për blerjen e energjisë. Theksojmë, që sipas “Metodologjisë së përcaktimit të çmimeve për shitjen e energjisë elektrike me pakicë të klientët fundorë që furnizohen nga Furnizuesi i Shërbimit Universal (FSHU)”, përcaktohet se marzhi i fitimit do të jetë një përqindje fikse, e cila nuk do të jetë më shumë se 3% mbi koston e blerjes së energjisë.

- Kostoja e lejuar e kapitalit të punës është llogaritur në vlerën 222 milionë lekë, bazuar në përcaktimet e metodologjisë së lartpërmendur.

- Kompensimi për borxhin e keq është llogaritur në masën 5%, bazuar në përcaktimet e VKM-në nr. 253, datë 24.4.2019, “Për miratimin e planit të konsolidimit financiar të sektorit publik elektroenergjetik”.

- Shoqëria FSHU sh.a. duhet të paraqesë analizat mbi llogaritjet e saj për shpenzimet operative, shpenzimet e amortizimit dhe marzhin e fitimit për secilën kategori të klientëve, duke përfshirë klientët të cilët janë të lidhur në TM, por me matje në TU dhe klientët e kategorizuar si objekte kulti, bazuar në përqindjet e sasive të energjisë elektrike të parashikuara për vitin 2020 për çdo kategori, sipas përcaktimeve të nenit 7, të “Metodologjisë së Përcaktimit të çmimeve për shitjen e energjisë elektrike me pakicë të klientët fundorë që furnizohen nga Furnizuesi i Shërbimit Universal (FSHU)”.

- Shoqëria ka paraqitur të ardhurat e kërkuara dhe të gjithë komponentët e saj për periudhën 2015–2020.

- Shoqëria ka marrë parasysh zhvillimet pozitive të ekonomisë shqiptare në moslogaritjen e ndonjë faktori jopozitiv në provigjionime të mundshme për efekt të raporteve të paqëndrueshme inflative të ekonomisë.

- Për sa u përket të dhënave të paqarta apo saktësimeve të nevojshme në këtë aplikim, do t'i kërkohej shoqërisë informacion dhe plotësimi i aplikimit, në përputhje me parashikimet e legjislacionit në fuqi.

- Në përfundim, shoqëria ka paraqitur totalin e të ardhurave të kërkuara për vitin 2020, në vlerën 57.054 miliardë lekë, për sasinë e energjisë elektrike të parashikuar për t'u shitur te klientët që shërbehen nga FSHU-ja prej 5,090 gwh, duke rezultuar në një tarifë mesatare të shitjes së energjisë elektrike 11.21 lekë/kwh për vitin 2020 dhe duke propozuar që çmimi mesatar i shitjes së energjisë elektrike, si dhe çmimet e detajuara sipas vendimit të ERE-s nr. 148, datë 26.12.2014 të mos ndryshojnë.

- Në lidhje me aplikimin e Operatorit të Sistemit të Shpërndarjes së Energjisë Elektrike për përcaktimin e tarifave sipas nivelit të tensionit për vitin 2020:

- Bazuar në nenin 19, të ligjit nr. 43/2015, "Për sektorin e energjisë elektrike", të ndryshuar, ERE është institucioni përgjegjës për miratimin dhe publikimin, në përputhje me parimin e transparencës dhe duke marrë në konsideratë koston e shërbimit të ofruar e tarifave të shërbimit të shpërndarjes së energjisë elektrike.

- Me shkresën nr. 25971 prot., datë 30.12.2019, protokolluar me tonën me nr. 4 prot., datë 6.1.2020, shoqëria OSHEE sh.a., në rolin e shoqërisë mëmë, ka paraqitur aplikimin për tarifën e Operatorit të Sistemit të Shpërndarjes për vitin 2020.

- Në aplikim sqarohet, se OSSH sh.a. fillon operimin si një shoqëri e pavarur prej datës 1.1.2020.

- Nga analiza e aplikimit vërehet se plotëson, kryesisht, kërkesat e parashikuara në "Rregulloren e organizimit, funksionimit dhe procedurave të ERE-s", miratuar me vendimin e Bordit të ERE- s nr. 96, datë 17.6.2016.

- Shoqëria deklaron, se në përlogaritjen e tarifës ka marrë parasysh gjendjen e vështirë financiare që po kalon shoqëria, për shkak të rritjes së shpenzimeve për sigurimin e energjisë elektrike nga tregu i lirë, si rrjedhojë e mosrealizimit të furnizimit nga KESH, për shkak të situatës jo të favorshme hidrologjike. Theksojmë se ky deklaram i shoqërisë i përket aktivitetit të shoqërisë FSHU sh.a., e cila siguron nga KESH sasinë e nevojshme të energjisë elektrike për përmbushjen e detyrimit të shërbimit publik.

- Shoqëria deklaron se kërkesa për energji elektrike për vitin 2020 parashikohet të jetë në sasinë prej 5,196 gwh, e cila përbëhet nga sasia prej 5091 gwh e parashikuar për t'u shpërndarë FSHU sh.a. dhe sasia prej 105 gwh, e cila do t'u shpërndahet klientëve të tjerë në treg të liberalizuar.

- Shoqëria OSSH ka paraqitur në formë sintetike shpenzimet operative të parashikuara për vitin 2020, të cilat janë përlogaritur bazuar në një studim mbi ndarjen e shoqërisë OSHEE në shoqëritë OSSH dhe FSHU, si dhe duke u mbështetur në të dhënat historike për realizimin e tyre për periudhën 2016–2019 dhe buxhetimin e shpenzimeve operative për vitin 2020.

- Shoqëria deklaron se përlogaritja e kërkesës për energji për mbulimin e humbjeve është bazuar në parashikimin për vitin në vazhdim, por që në varësi të ndryshimeve në treg mund të jetë, gjithashtu, objekt i kompensimeve për diferenca në periudha të tjera. Sasia e energjisë elektrike të injektuar në sistemin e shpërndarjes për vitin 2020 parashikohet të jete 6,495 gwh, ku sasia e energjisë elektrike të shpërndarë parashikohet të jetë 5,196 gwh, kurse humbjet e energjisë elektrike në rrjetin e shpërndarjes janë vlerësuar nga shoqëria në sasinë 1,299 gwh, duke parashikuar që niveli i humbjeve të sasi e cila përbën 20%.

- Shoqëria sqaron se energjia elektrike për humbjet në rrjet mbulohet nga prodhimi i HEC-eve private dhe nga prodhuesit nga burime të rinovueshme, ndërsa në rastet kur sasia e prodhuar nga ato është më e vogël se sasia e humbjeve në rrjet, diferenca do të blihet në tregun e lirë.

- Çmimet me të cilat HEC-et private, prodhuesit nga burime të rinovueshme dhe OST do t'i shesin shoqërisë OSSH sh.a. energjinë elektrike dhe shërbimin e transmetimit, janë supozuar 8.46 lekë/kwh për energjinë e blerë nga HEC-et private, 12.46 lekë/kwh për energjinë e blerë nga burime të rinovueshme dhe në 0.75 lekë/kwh për shërbimin e transmetimit nga OST-ja.

Lidhur me sa më sipër, theksojmë se shpenzimet për blerjen e energjisë elektrike për mbulimin e humbjeve në rrjetin e shpërndarjes, të llogaritura me çmimin mesatar të ponderuar prej 8.5 lekë/kwh, duhet të rishikohen në funksion të çmimeve të miratuara nga ERE për prodhuesit ekzistues me përparësi dhe prodhuesit e rinj të energjisë elektrike për vitin 2020.

- Shoqëria ka pasqyruar bazën e rregulluar të aseteve (RAB), duke evidentuar vlerën bruto të tyre, si dhe amortizimin total të akumuluar për periudhën 2015–2019.

- Shoqëria duhet të paraqesë bazën e rregulluar të aseteve (RAB), duke evidentuar shtesat e aseteve të kapitalizuara në formë analitike, të cilat i përkasin shoqërisë OSSH sh.a., llogaritjet e amortizimit të akumuluar për periudhën 2015–2019, si dhe parashikimet për vitin 2020.

- Shoqëria ka propozuar që kostoja mesatare e ponderuar e kapitalit (WACC) të jetë 8.03%, sipas arsyetimeve të paraqitura në aplikim.

- Shoqëria ka marrë parasysh zhvillimet pozitive të ekonomisë shqiptare në mosllogaritjen e ndonjë faktori jopozitiv në provigjionime të mundshme, për efekt të raporteve të paqëndrueshme inflative të ekonomisë.

- Në përllogaritjen e të ardhurave të kërkuara, shoqëria kërkon vlerën prej 12.4 miliardë lekë si të ardhur të parealizuar nga aplikimi i tarifave aktuale, për periudhën 2015–2019, dhe propozon që për kompensimin e kësaj humbjeje financiare, të shkaktuar kryesisht nga aktiviteti i shërbimit të shpërndarjes, të aplikohet si korigjim në tarifën e shpërndarjes së energjisë elektrike, vlera prej 3 miliardë lekësh/vit për 4 vjetët e ardhshëm.

- Shoqëria deklaron se në kushtet e mungesës së informacionit të detajuar për të llogaritur saktësisht, tarifat për nivel tensioni, sikurse është përmendur edhe në aplikim, për përllogaritjen e tarifave sipas nivelit të tensionit për vitin 2020, është bazuar në:

- kërkesën për të ardhura të vitit 2020 të llogaritur për Operatorin e Sistemit të Shpërndarjes;

- koeficientët e shpërndarjes së shpenzimeve (alokimit) që marrin parasysh sasinë e energjisë së shitur, sipas strukturës së shitjes, strukturën e aseteve sipas nivelit të tensionit dhe humbjet teknike të energjisë elektrike sipas nivelit të tensionit.

- Për sa u përket të dhënave të paqarta apo saktësimeve të nevojshme në këtë aplikim, do t'i kërkohej shoqërisë informacion shtesë dhe plotësimi i aplikimit përgjatë procesit të shqyrtimit të aplikimit, në përputhje me parashikimet e legjislacionit në fuqi.

- Në përfundim, shoqëria ka paraqitur totalin e të ardhurave të kërkuara për vitin 2020 në vlerën 30.994 miliardë lekë, për sasinë e energjisë elektrike të parashikuar për t'u livruar në rrjetin e shpërndarjes prej 5,196 gwh, duke rezultuar në një tarifë mesatare shpërndarjeje prej 5.97 lekësh/kwh nga tarifa prej 4.79 lekësh/kwh në fuqi, me propozimin për miratimin e tarifave, sipas nivelit të tensionit për vitin 2020, si më poshtë vijon:

a) tarifa e shpërndarjes së energjisë elektrike në tension 35 kV–3.32 lekë/kwh nga tarifa prej 1.5 lekësh/kwh në fuqi;

b) tarifa e shpërndarjes së energjisë elektrike në tension 20-6 kV–4.32 lekë/kwh nga tarifa prej 3.9 lekësh/kwh në fuqi;

c) tarifa e shpërndarjes së energjisë elektrike në tension 0.4 kV–6.35 lekë/kwh.

Për gjithë sa më sipër, Bordi i ERE-s

VENDOSI:

1. Fillimin e procedurës për shqyrtimin e aplikimit të FSHU sh.a., për përcaktimin e çmimit të shitjes me pakicë për klientët që shërbehen nga furnizuesi i shërbimit universal për vitin 2020.

2. Fillimin e procedurës për shqyrtimin e aplikimit të shoqërisë OSSH sh.a. për përcaktimin e tarifave, sipas nivelit të tensionit për vitin 2020, si më poshtë:

- a) tarifa e shpërndarjes së energjisë elektrike në tension 35 kV–3.32 lekë/kwh;
- b) tarifa e shpërndarjes së energjisë elektrike në tension 20-6 kV–4.32 lekë/kwh;
- c) tarifa e shpërndarjes së energjisë elektrike në tension 0.4 kV–6.35 lekë/kwh.

3. Drejtoria e Tarifave dhe e Çmimeve të njoftojë palët e interesit për vendimin e Bordit të ERE-s.

Ky vendim hyn në fuqi menjëherë

Ky vendim botohet në Fletoren Zyrtare.

Për këtë vendim mund të kërkohej rishikim, brenda 7 ditëve kalendarike, si dhe mund të bëhet ankim në Gjykatën Administrative Tiranë, brenda 30 ditëve kalendarike nga dita e publikimit në Fletoren Zyrtare.

KRYETAR
Petrit Ahmeti

